

ეთიკის კომისიის

ზეპირი

რეკომენდაცია

შეკითხვის კომისიაში შემოსვლის თარიღი: 24.04.2015

შეკითხვის რეგისტრაციის ნომერი: 008/15

შეკითხვა:

ადვოკატი შესაბამის საგადასახადო ორგანოებში დარეგისტრირებულია, როგორც გადასახადის გადამხდელი ფიზიკური პირი. იგი არ არის რომელიმე საადვოკატო ბიუროში მომუშავე ადვოკატი, თუმცა, ლიცენზია მინიჭებული აქვს საერთო სპეციალიზაციით და ეწევა პროფესიულ საქმიანობას. აქვს თუ არა აღნიშნულ ადვოკატს ორდერის გამოწერის უფლება?

ანალიზი:

„ადვოკატთა შესახებ“ საქართველოს კანონის მე-19 მუხლის მე-2 პუნქტი: „გამომიების ორგანოებში ან საქმის სასამართლოში განხილვისას ადვოკატი ვალდებულია საადვოკატო საქმიანობის უფლების დამადასტურებელ მოწმობასთან ერთად წარადგინოს დადგენილი წესით კლიენტის მიერ მასზე გაცემული დოკუმენტი – მინდობილობა ან ორდერი.“

„ადვოკატთა შესახებ“ საქართველოს კანონი მე-19 მუხლით განსაზღვრავს საადვოკატო საქმიანობის განხორციელების საფუძველს. ნორმის მიხედვით, ადვოკატი საადვოკატო საქმიანობას ახორციელებს ხელშეკრულების საფუძველზე (პუნქტი 1). ამავე მუხლის მეორე პუნქტის მიხედვით, „გამომიების ორგანოებში ან საქმის სასამართლოში განხილვისას“ ადვოკატმა უნდა წარადგინოს მასზე გაცემული მინდობილობა ან ორდერი. კანონის აღნიშნული მუხლი არ მიუთითებს, რომ მხოლოდ საადვოკატო ბიუროში მომუშავე ადვოკატს შეუძლია ორდერის გამოწერა. რეგულაციის მიხედვით, ორდერის ან მინდობილობის წარდგენის ვალდებულება აქვს ზოგადად ადვოკატს. საადვოკატო პრაქტიკულ საქმიანობაში ფიქსირდება ადვოკატების, როგორც გადასახადის გადამხდელი ფიზიკურ პირების მიერ ორდერის გამოწერის შემთხვევები. ადვოკატმა, ორდერის გამოწერისას, უნდა მიუთითოს, რომ საქმიანობას ეწევა როგორც ფიზიკური პირი, ასევე, მისი საიდენტიფიკაციო მონაცემები და სიითი ნომერი.

საქართველოს ადვოკატთა ასოციაციის აღმასრულებელი საბჭოს 2006 წლის 01 თებერვლის გადაწყვეტილებით განსაზღვრულია ის სავალდებულო მოთხოვნები, რომლებსაც უნდა

შეიცავდეს ადვოკატის ორდერი. აღნიშნული ჩამონათვალი ზოგადია და, შესაბამისად, ადვოკატის, როგორც ფიზიკური პირის მიერ მისი გამოწერის შემთხვევაში, არ მიეთითება იურიდიული პირის მონაცემები. ორდერის სავალდებულო რეკვიზიტებია: ა) იურიდიული ფირმის, ბიუროს, ადვოკატის დასახელება, მისამართი, ორდერის გაცემის თარიღი; ბ) დოკუმენტის დასახელება - ორდერი; გ) ადვოკატის სახელი, გვარი, სიითი ნომერი; დ) იურიდიული პირი - სახელწოდება, რეგისტრაციის ნომერი; ე) დავალების შინაარსი (უნდა მოიცავდეს საპროცესო მოქმედებას და მათი შესრულების ადგილს ან ორგანოს); ვ) ორდერის გამცემი პირის ხელმოწერა; ზ) ორდერის მოქმედების ვადა.

დასკვნა:

„ადვოკატთა შესახებ“ საქართველოს კანონის მე-19 მუხლის მე-2 პუნქტის შესაბამისად, ადვოკატს, როგორც გადასახადის გადამხდელ ფიზიკურ პირს, აქვს ორდერის გამოწერის უფლება, ვინაიდან რეგულაციის მიხედვით, ორდერის ან მინდობილობის წარდგენის ვალდებულება აქვს ზოგადად ადვოკატს.

რეკომენდაცია არ არის სავალდებულო ს.ს.ი.პ. საქართველოს ადვოკატთა ასოციაციის ეთიკის კომისიის ან სასამართლოს მიერ საქმის განხილვის ეტაპზე, თუმცა შესაძლებელია, გამოყენებულ იქნეს ეთიკის კომისიის გადაწყვეტილებაში, როგორც ერთ-ერთ წყარო.